

երբեմն զայս եզ արարեալ, զարուսն խառնակեալ պղծեր. եւ երբեմն ընդ ա-  
նասունս խառնակեր: 8 Եւ այսպէս դիւաւք վարեալ, որք ի նմայն էին բնա-  
կեալ զամենայն աւուրս կենաց իւրոց<sup>1</sup>:

ԳԼՈՒԽ ԻԳ.

1 Յաղագս յանդիմանութեանն սրբոյն Ներսէսի, զի հանապազ թշնամի եր<sup>2</sup> թագա-  
ւորին Պապայ վասն մեղաց նորա:

2 Այլ սուրբն Ներսէս եպիսկոպոսապետն Յայոց հանապազաւր ընդդի-  
մացեալ թագաւորին Պապայ, կշտամբեր եւ յանդիմաներ մեծաւ վկայու-  
թեամբ յանդիմանութեամբ. եւ վասն չարեաց նորա բազմաց ոչ համարձա-  
կեր նմա զսեամս եկեղեցւոյն կոխել, եւ ոչ մտանել նմա ի ներքս: 3 Յանապազ  
կշտամբեալ յանդիմաներ եւ խրատեր, զի գտցէ զանձն իւր ի կորստենէ գոր-  
ծոց իւրոց. եւ հանապազ խաւսեր ընդ նմա, զի փոյթ արասցէ ապաշխարու-  
թեան: 4 Դներ առաջի նորա վկայութիւնս ի գրոց, ահ արկանելով յաւիտենա-  
կան դատաստանացն պատժովք գալ ի զգաստութիւն եւ ի լաւանալ, եւ յա-  
ռաջդիմութեան արդարութեան կարգացն եւ գործոցն սրբութեան փոյթ առ-  
նել:

5 Իսկ թագաւորն Պապ լսելոյ նմա ոչ լսեր՝ այլ եւ ընդդիմացեալ եւս մեծաւ  
թշնամանաւք, եւ մահու սպասեր նմա, եւ կամեր սպանանել զնա յայտնի.  
բայց ի թագաւորէն Յունաց յայտնի եւ անարգել անգամ բանիւք չիշխեր, եւ  
ոչ սակաւ մի համարձակել ի նա թող, թէ մահու աղագաւ: 6 Նա եւ իւր իսկ  
աշխարհի մարդիկն եւ զաւրբն ամենայն չառնուին յանձն զայսպիսի ինչ առ-  
նել. այր՝ զորմէ ամենայն մարդիկ աշխարհին Յայոց կախեալ կային զնմանէ  
վասն արդար գործոցն, սրբութեան գնացիցն յաշխարհի, խաղաղութեամբ  
մեծի առաջնորդութեանն. նա եւ վասն յայտնի նշանագործութեանն սքանչե-  
լեացն՝ զոր առներ, իբրեւ յերկնաւոր հրեշտակ՝ այնպէս նային ամենայն  
մարդ: 7 Եւ թագաւորն ռիսացեալ էր ընդ նմա, եւ ինդրեր սպանանել զնա. այլ  
յայտնի զայս եւ բանիւք ճառել ոչ իշխեր<sup>3</sup>, թէ ոչ՝ իւր զաւրբն սպանանէին  
զնա: 8 Չի այնպէս ամենայն մարդ ապաստանեալ էին յաղաւթս նորա, եւ սի-  
րէին զնա առ հասարակ մեծամեծք եւ փոքունք, պատուականք եւ անարգք,  
ազատք եւ շինականք միանգամայն:

1 *Օրինակ մի յաւելու՝* վասն անգեղջ գնացիցն՝ մնայր դենս

2 *Օրինակ մի՝* թշնամաներ

3 *Օրինակ մի յաւելու՝* ոչ կարեր